

Den apenas un siman dos minister di MEP a bay cas

Diaranson marduga despues di 1or di marduga Parlamento di Aruba a aproba e mocion di desconfianza contra minister demisionario di Enseñansa y Deporte, Endy Croes. Esaki ta bin despues cu iregularidadnan na Fundacion di Subsidio di Deporte Aruba (SSA) a sali na cla.

Durante e di tres reunion publico di e aña parlamentario nobo e mocion di desconfianza, cu a wordo presenta pa parlamentario di fraccion AVP, Sr. Arthur Dowers, a wordo aproba cu 11 voto na favor y 10 voto contra. Parlamentarionan cu a vota na favor di e mocion ta parlamentarionan di fraccion AVP, RAIZ, MAS, ACCION 21 y parlamentario independiente Gerlien Croes. Fraccion MEP y parlamentario independiente Rycond Santos do Nascimento a vota contra e mocion.

Segun e mocion di desconfianza presenta a indica, Parlamento a yama e minister concerni pa duna splicacion pa loke ta trata e investigacion riba iregularidadnan na SSA teniendo den consideracion cu SSA tin como meta pa pone fondonan disponibel pa clubnan deportivo, asociacionnan deportivo y gruponan deportivo cu ta enfoca riba actividadnan deportivo.

E documento ta remarca tambe cu e director di SSA tabata emplea simultaneamente na oficina di minister di Enseñansa y Deporte, y cu debi na e relacion di autoridad entre e minister y e director di SSA, tin un conflicto di interes pa loke ta trata e debonan y responsabilidanan di e minister di un banda y di otro banda, e director di SSA, en particular pa loke ta trata e suministro di recursonan financiero.

E mocion ta resalta cu e relacion di autoridad entre e Minister y e director di SSA tin un efecto restrictivo riba control y balansa apropiada ora di gasta recursonan door di SSA.

E documento ta agrega cu recientemente a sali na cla cu minister di Enseñansa y Deporte, den e capacidad ey, ta duna ordo, sea disfrasa of no, na SSA pa pone recursonan di SSA disponibel pa paga



gastonan specifico, y cu tal accion ta mina e checks and balances cu ta pretende ora di pone fondonan disponibel pa medio di un fundacion, esta pa medio di un entidad huridico apart pa loke ta trata e Pais Aruba, unda cu un minister no mester duna ordo disfrasa na ken e fondonan menciona ta wordo paga afo.

E mocion ta remarca tambe cu a pesar di su experiencianan como director di Fundacion Lotto pa Deporte y e decisionnan di corte relaciona riba iregularidadnan y mal practica observa, e minister a emplea personanan cu lasonan directo cu e Minister den posicionnan crucial pa medio di un regimen administrativo y di supervision di SSA, cu ta delicado pa influencia di e minister riba e gastonan di recursonan financiero y accionnan asina ta contrario na e principionan di Bon Gobernacion Corporativo.

E documento ta sigui señala cu e nombramento di personanan cu un conexon directo cu ministernan ta limita control y balansnan apropiada pa preveni iregularidad y abusonnan cu recursonan di SSA.

Cu e mocion aki e parlamentarionan ta enfatisa cu e puntonan ariba menciona ta dañá e confianza di Parlamento den e Minister di Enseñansa y Deporte pa e debido gasto di recursonan pa medio di SSA y cu debi na e accionnan di e minister concerni, Parlamento no por depende riba cu e recursonan di e SSA ta wordo gasta manera mester ta, hasta den calidad di minister saliente.

E mocion ta agrega cu ta importante cu, ademas di recursonan di caha nacional, recursonan di subsidio publico tambe ta wordo gasta respon-


sablemente, cu control y balansnan apropiada, caminda un minister no ta eherce influencia irresponsabel riba gastonan specifico di e recursonan ey, specialmente si esaki tuma luga di tal manera cu e diseño di e proceso di gasto ta wordo mina.

Por ultimo, ta enfatisa cu Parlamento tin un responsabilidad pa tuma e medidanan necesario dentro di e facultadnan otorga na Parlamento pa garantisar uso responsabel di recursonan door di ministernan mas leu cu ta posibel y como tal e mocion ta kita confianza den e minister di Enseñansa y Deporte, Endy Croes y como consecuencia e mandatario mester wordo retira inmediatamente di su funcion.

Pa loke ta trata kico ta e siguiente pasonan, segun prome minister Evelyn Wever-Croes a indica despues cu e mocion di desconfianza, awor lo inicia e proceso di retiro di e minister y lo apunta un persona pa reemplaza y tuma over e carteranan di e minister demisionario. No a informa ken ta e persona cu ta bay encarga cu e tareanan aki.

El a indica cu aunke Sr. Croes mester retira di su funcion como minister di Enseñansa y Deporte, no ta nifica cu e ta reitera for di partido MEP, manera tabata e caso cu e ex colega Glenbert Croes, ken tambe recientemente mester a entrega su retiro pa motibo di sospecho di corrupcion. E mandatario a indica cu Sr. Endy Croes a bay sigui campaña pa e siguiente eleccion.

Mester remarca cu esaki ta bira e di dos minister di partido MEP cu ta retira den un termino di un siman. Siman pasa ex-minister demisionario di Labor, Energia y In-



tegracion, Glenbert Croes a haya su mes practicamente obliga pa tuma su retiro despues cu el a ser deteni dia 7 di october ultimo pa ta sospechoso den caso Portulaca. E ex-minister ta wordo acusa di soborno y mal uso di funcion.

Den caso di Sr. Endy Croes, no ta e minister a tuma su retiro pero Parlamento di Aruba a retira e persona di

su funcion, esaki ta nifica cu e minister no mester entrega un carta di retiro na prome minister. Aworaki e siguiente paso ta wak pa su excelencia Gobernador di Aruba firma y confirma e retiro di e minister. Ta premira cu su excelencia Gobernador di Aruba lo confirma esaki mirando cu no tin motibo pa e bay contra decision y deseo di Parlamento di Aruba.